



Cumün d'Ardez

Radunanza cumünala nr. 10/09 dals 26-05-2009

Preschaints: 30 votants e votantas
1 persuna sainza dret da vuschar

S-chüsats: Claudio Franziscus
Andri Marighetto
Chasper Stupan
Jon Armon Strimer
Reto Strimer

Tractandas:

1.	Approvaziun dal protocol dals 10-03-2009	
2.	Rendaquint 2008	578
3.	Tscherna dal büro da revisiun	579
4.	Collavuraziun per controllas pulizialas culs cumüns vaschins, credit per la partecipaziun annuala da fr. 20'000.00	580
5.	Credit da fr. 48'000.00 per las lavuors vi da la rait electrica Ardez ost	581
6.	Orientaziuns e varia	

1. Approvaziun dal protocol dals 10-03-2009

Il protocol da la radunanza cumünala dals 10-03-2009 vain approvà unanimamaing.

FINANZAS

10.

2. Rendaquint 2008 578 Quint da gestiun 2008

La suprastanza cumünala preschainta il quint da gestiun 2008 a la radunanza cumünala. Il quint da gestiun serra cun ün surplü d'entras da fr. 45'910.65.

Quint d'investiziun 2008

La suprastanza cumünala preschainta il quint d'investiziun 2008 chi serra cun ün'investiziun netta da fr. 1'008'617.95. Büdschettà d'eiran investiziuns nettas da fr. 973'000.00.

Preschantats vegnan eir il bilantsch e la survista da finanziaziun. Quella survista muossa cha'l cashflow importa 544'710.15 ed es restà i'l rom dals ons avant. Implü fan divers votants dumondas a la suprastanza a regard il quint da gestiun ed a regard il quint d'investiziun.

Sar Men Janett orientescha cha'l president da la cumischiun sindicatoria nu possa esser preschaint a quista radunanza. Implü orientescha'l cha quist on haja fat il büro Lischana Fiduziari per la prüma jada la revisiun dal quint dal cumün d'Ardez. El orientescha chi haja gnü lö üna sezzüda cul büro Lischana Fiduziari, la cumischiun sindicatoria e cul capo. Sar Men Janett prelegia il rapport da revisiun e propuona d'approvar il rendaquint 2008 e da dar dis-charg als organs respunsabels.

Decisiun: La radunanza cumünala approva il rendaquint 2008 unanimamaing e da dis-charg als organs respunsabels.

3. Tscherna dal büro da revisiun

579

Il capo orientescha cha per l'on 2008 haja fat il büro Lischana Fiduziari la revisiun da quint e cha la suprastanza cumünala saja fich cuntainta culla collavuraziun. El orientescha cha la suprastanza cumünala fetscha la proposta da mantgnair la collavuraziun cul büro e da tscherner eir per la revisiun da quint per l'on 2009 il büro Lischana Fiduziari.

Decisiun: La radunanza cumünala tscherna unanimamaing il büro Lischana Fiduziari per far la revisiun dal quint 2009.

PULIZIA**30.****4. Collavuraziun per controllas pulizialas culs cumüns vaschins, credit per la partecipaziun annuala da fr. 20'000.00**

580

Il capo orientescha cha in general hajan ils cumüns fadia da chattar personal chi sta in cumün e chi surpiglia las controllas pulizialas. Our da quel motiv s'han ils cumüns da Sent e Scuol drizzats a la pulizia chantunala e fat la dumonda da collavuraziun per las controllas pulizialas cumünalas. Per nos cumün es quella problematica eir avantman. Per Ardez daja la pussibilità da far part al proget dals cumüns Sent, Scuol, Ftan e Tarasp. Per pudair far quista lavur gniss s-chaffi pro la pulizia chantunala üna piazza per ün pulizist e duos plazzas per assistents. Il proget cumplessiv pels 5 cumüns maina cuosts da fr. 325'000.00. La partecipaziun annuala per Ardez importa fr. 20'000.00. Il contrat in fuorma d'üna cunvegna da prestaziun gniss stipulà individual per mincha cumün e quai per la dūrada d'almain trais ons. Il capo orientescha cha la suprastanza cumünala s'haja occupada intensivamaing cun quista tematica e fetscha la proposta d'approvar il credit per la partecipaziun. Il tempo 30, il uorden da parcar e la malcuntantezza pro reglamaints e uordens cumünals (p.ex. il uorden da chans) sun stats ils argumaints principals. Implü orientescha il capo cha cun quista cunvegna possa mincha singul cumün decider che chi dess gnir controllà. La collavuraziun gniss in vigur per l'on 2010.

Üna votanta es da l'avis cha quista collavuraziun per las controllas pulizialas saja üna buna roba e fa la proposta d'includer illa cunvegna eir controllas a regard rument. Ün votant orientescha ch'el haja contactà a la presidenta dal cumün da Guarda per congualar co cha las controllas pulizialas vegnan fattas là. El es da l'avis cha ad Ardez pudessan ils lavuraints da cumün eir surtour las controllas pulizialas sco cha quai es il cas a Guarda. Il capo argumentescha cha Guarda cun damain abitants, ingün tempo 30 ed ün uorden da parcar plü simpel nu possa gnir tut sco congual. Oters votants vezzan eir ün problem pro la mansteranza, ingiò chi nun es adüna pussibel da parcar ils autos sün üna piazza da parcar. Il capo argumentescha chi's pudess eir introdüer üna sort vignetta per la mansteranza, quai chi vain praticchè fingià in oters lös. Ün votant es da l'avis chi dess gnir introdüt il prüm l'uorden da parcar e verer co chi'd es la situaziun cul uorden da parcar e pür schi's vezza, chi fa propa dabsögn, surdar las controllas a la pulizia chantunala. Ün votant es da l'avis chi füss important da sustgnair la proposta da la suprastanza e surdar las controllas a la pulizia chantunala, implü es il votant da l'avis chi füss eir important d'introdüer ün uorden per las vias champestras. I vegnan fattas amo diversas dumondas e remarchas a la suprastanza.

Il capo serra la discussiun e driva il proceder da votumaziun.

Ün votant fa la proposta da far la votumaziun in scrit. Il capo piglia incunter la proposta ed orientescha cha quella saja acceptada, scha duos terzs dals votants approvan quella. La radunanza cumünala es perincletta cun quist proceder.

Decisiun: La radunanza cumünala nun approva la proposta cun 11 a 17 vuschs.

Decisiun: La radunanza approva il credit annual per las controllas pulizialas da fr. 20'000.00 e quai per la dūrada d'almain 3 ons cun 16 a 13 vuschs.

PROVEDIMAIN D'ENERGIA

08.

5. Credit da fr. 48'000.00 per las lavuors vi da la rait electrica Ardez ost

581

Il schef infrastruttura orientescha chi saja necessari da megliorar la situaziun da la rait electrica da la part Ardez ost. Ils cuosts per quista lavur s'amuntan a fr. 48'000.00. Quist müdamaint da la rait fa dabsögn causa cha la ledscha federala nun admetta plü chi sun tachadas vi d'ün scumpart daplü co 3-4 chasas. Implü faja dabsögn da far il müdamaint causa l'attach dal quartier Curtinatsch. In plüssas etappas dess gnir megliorà eir la situaziun dal rest dal cumün. I vegnan fattas amo diversas dumondas a la suprastanza cumünala chi pon gnir argumentadas.

Decisiun: La radunanza cumünala approva il credit da fr. 48'000.00.

6. Orientaziuns e varia

6.1 Posta Ardez

Il capo orientescha ch'el haja gnü üna sezzüda cun ün rapreschantant da la direcziun da la posta a regard il serrar las postas. Pro las 420 postas chi vegnan examinadas apartegna eir la posta d'Ardez. La direcziun da la posta vezza per Ardez eir ün'alternativa in fuorma d'ün agentura. In quella sezzüda ha il capo argumentà cha la situaziun da la posta-butia saja ad Ardez ideala. La suprastanza, chi ha trattà la chosa, saja unanim cunter ün müdamaint da la situaziun actuala. Tenor seis sentimaint nu saja neir la populaziun absolut na perincletta d'acceptar ün müdamaint. La suprastanza cumünala survain ün protocol da la sezzüda per tour posiziun.

6.2 Vias champestras

Ün votant orientescha cha las chünettas pro la via da Sur En vers Sampuoir sajan plain material e chi füss necessari da pulir plü svelto pussibel per cha'ls dons nu vegnan plü gronds. Quista remarcha vain datta inavat al schef stradal.

6.3 Discussiuns a la maisa raduonda

Ün votant manzuna a regard üna remarcha cha'l capo ha fat dūrant la discussiun sur da las controllas pulizialas. El chatta deplorabel schi nu's pudess plü far discussiuns politicas a la maisa raduonda, chi saja important cha'ls votants as possan s'occupar eir in quel lö cun dumondas politicas. Il capo chi vaiva dit cha quai stess rafüdar, as s-chüsa per quella remarcha ch'el ha fat dūrant la discussiun.

6.4 Bügl Bröl, glüm da vias

Ün votant orientescha cha'l bügl da Bröl saja gnü donnagià cun ir culla ruotta. El giavüscha cha'l bügl vegna cumadà, implü manzuna'l cha la glüm pro la chasa 63 stuvess gnir spostada per sclerir plü bain la giassa da la vart.

6.5 Taxa da cumpensaziun pumpiers

A regard cha'l departamaint da pumpiers ha fat ün guadagn dal 2008, mania ün votant chi füss d'adattar la taxa da cumpensaziun per giuvenils chi sun our d'cumün

per motivs da scolaziun. La suprastanza po argumentar chi nu saja pussibel tenor ledscha superiura da far duos differentas taxas.

6.6 Immundizchas

Ün votant orientescha cha'ls uffants da scoula gijajan tras cumün cun bavrondas e büttan il rument per las vias intuorn. El fa la dumonda schi nu füss pussibel cha'ls magisters orientessan als uffants da nu far quai.

6.7 Tablas da protecziun

Ün votant orientescha cha avant ons haja la società da chatschaders montà tablas per la protecziun da las bes-chas, quellas tablas sajan devastadas e fetschan üna noscha parada. Il votant fa la dumonda schi nu füss pussibel d'allontanar quellas. La suprastanza sclerischa la chosa.

6.8 Autos sainza nomer parcats sün scoula

Ün votant orientescha chi sajan fingià daspö ün on autos sainza nomer, parcats sün scoula. El giavüscha cha la suprastanza agischa e fetscha tour davent quels veiculs.

6.9 Bancomat

Ün votant orientescha cha'l bancomat da la Raiffeisen saja ün dals bancomats chi portan bler schmertsch. Adonta da quai fa la Banca Raiffeisen üna perdita da var fr. 15'000.00 l'on cul bancomat. Il votant orientescha chi til haja dat in ögl cha'l cumün haja plüs impraists pro la Banca Chantunala e ch'el sperescha cha almain la mittà da quels vegna tut pro la Raiffeisen, quai eir causa chi saja gnü montà da quella il bancomat ad Ardez.

6.10 Ordinaziun executiva dal quartier Curtinatsch

Ün pèr votants criticheschan l'agir da la suprastanza in connex cull'ordinaziun executiva. Implü vain discutà sur d'üna dumonda da fabrica preliminar e cha las directivas da la suprastanza fattas cun l'ordinaziun sajan massa strettas. Il schef infrastruttura piglia incunter quista critica e vezza il bsögn da tscherchar il dialog culs pertocs. Pro la dumonda missa in discussiun nun es amo entrada la resposta dal petent e tras quai nun haja amo pudü gnir ad ün dialog.

12-06.-09

In buna fai

La chanzlista:

Il capo: